

Oqaasiliortut ataatsimiinnerat

**Ataasinngorneq, aggustip 19-ianni 2013, nal. 10.00
Oqaasileriffimmi.**

Peqataasut: *Carl Chr.Olsen, Stephen Heilmann, Eva M.Thomassen, Karl Møller aamma Katti Frederiksen.*

Allatsi: *Katti Frederiksen*

Oqaluuserisassatut siunnersuutit:

1. Tikilluaqqusineq aamma ilisimatitsissutit.
Siulittaasoq tikilluaqqusivoq nalunaarutigalugulu Karl Møller maannamiit sinniisutut peqataanani ilaasortatut peqataasalermat.

Nalunaarutit ilisimatitsissutillu assigiinngitsut oqaatigineqarput;
 - a) Arktisk Rådimi Issittormiut oqaasiinik misissuilluni qulaajaanermi suliap ingerlanera 2014-ip naanerani nalunaarusiorneqassaaq.
 - b) Islandimi Nunat Avannarliit oqaatsit pillugit ukiumoortumik ataatsimiinnissaanni CCO, KF aamma EMT peqataassasut nalunaarutigineqarput, ilanngullugu ataatsimiinnermi oqaluuserisassat paasissutissatut tunniunneqarput.
 - c) Oqaatsinut politikimik taassumalu ilassutissaanik kalaallisut allagartalersuinermit tunngasoq pillugu Inuussutissarsiornermut Aatsitassaqaqarnermullu Naalakkersuisoq upernaamut Inatsisartut ataatsimiinneranni saqqummiussiumaartoq ilisimatinneqarnerput Oqaasiliortunut apuunneqarpoq.
Tassunga patsisigitinneqarpoq pappiaqqat nalillit pineqartillugit oqartussaaffik tassunga tunngasoq sulii nunatsinnut nuunneqarsimanngimmat, kiisalu kalaallisut allagartalersuisoqartalerneqatigut aningaasat 10 mio. tikillugit aningaasartuutaasussaasutut naatsorsorneqarsimasut pisiniarfiuteqartunut mikisunut artukkiisinnaanissaat ernumasaarutigineqarluni.
Tassunga tunngatillugu Oqaasiliortuni oqaatigineqarpoq aningaasat taama annertutigisut piviusorsiunngitsut, Oqaasileriffeqarneralu atorluarlugu taamatut inatsiseqalerneq ajornaquteqanngitsumik aaqinneqariaannaagaluartoq.
 - d) Oqaasiliortunut ilisimatitsissutigineqarpoq Oqaasileriffimmut aningaasaliissutit finanslovimi qaffanneqarsimanerat. 4,3 mio. kruuninngorlutik, tassani qaffaataasumi sprogteknologip Oqaasileriffimmut nuunneqarluni oqartussaaffigineqalenera

anguneqassaaq.

e) Oqaasileriffiup nittartagaqarnermigut ukiuni arlalinngortuni ajornartorsiuteqaqattaartup aaqqivinneqarnissaa pillugu sprogteknologiimi suleqatitsinnit Tino Didriksenimit tiguneqarnissaa siunniunneqartoq aamma ilisimatitsissutigineqarpoq. Tino oktobarimi tikisillugu nittartakkatsinni suut piumasaaqatigerusunnerivut saqqummiullugit qanimut naapeqatigineqarnissaa pilersaarusionerpoq.

f) Inuit aqqi pillugit atuakkiq sumut killinnersoq CCO nassuiaateqallatsiarpoq.

2. Kingullermik ataatsimiinnermit imaqarniliap akuerineqarnera. Taamaatillugu akuerineqarpoq.
3. NAA-mi IAA-milu ilaasortassamik toqqaaneq. Karl Møller taarsikkami ilaasortaaffigisimasai, IIA-mi NAA-milu ilaasortaanerit aamma qinigaaffigilerpai.

Saaffiginnissutit.

a) fartstilladelse

Oqaasiliortut assartuisinnaanermut/angallassisinnaanermut akuersissummik taaguuserneqarnissaannik siunnersuuteqarput, saaffiginnittulli nalunaarutigaa una piumanerullugu: angalasinnaanermut akuersissut. Taanna Oqaasiliortut ataatsimiinnissaanni tullermi eqqartorneqartussanngorlugu inissippoq.

b) konflikthåndtering

saaffiginnissummut assingusumik Oqaasiliortut akuersissuteqareernikuupput, tassalu konfliktmæglingimut taaguusiinikuugamik ima: saqitsaannermi/aaqqiagiinnginnermi nalerisaaneq. Tassunga ungasippallaanngitsumik saaffiginnissut akineqassasoq isumaqatigiittoqarpoq, tassalu **saqitsaannermi/aaqqiagiinnginnermi nalerisaannermi suliaqarneq.**

c) siuteroq imalt. kaattungiaq

Kaattungiaq Samuel Kleinschmidt 1871-imi ordbogiliani ima nassuiarsimavaa:

En Ruur; en balan (saavel de, der sidde på stene eller muslingeskaller, som de, der sidde paa hvaler).

Aamma ordbog nutaaneq malillugu ullumikkut ima nutserneqarsimavoq:

kaattungiaq t rur (-en), strandsnegl (-en)

Siuteroq tassaavoq qalerualik danskisut negl. Taannaavoq sissamiittartut uumasuarannguit erinarsorfigalugit uinngiarsorfigalugilluunniit anillatsin-niarlugit pisakkavut.

Kisianni ordbog saqqummersoq kingulleq malillugu paasinarpoq kaattungiaq assigiinngitsunik marlunnik nutserneqarsimasoq, tassa strandsneglimik aamma nutserneqarsimavoq.

Taamaattumik maanna inuit aamma atuinerat taamaattoq paasinarpoq, soorlutaaq aamma erinarsuummiittoq.

Arlaatigut taputartuussinermi pilersimasoq Oqaasiliortut oqaatigaat, taamaattumik siuteruarannguit taakkua pineqartut ilaasa kaattungianik taasalersimavaat.

d) Direktør for eksterne relationer kalaallisut taaguutissaa pillugu Oqaasiliortut ima siunnersuusiorput: Ingerlatsivinnik avataaneersunik suleqateqarnermi pisortaq imalt. Allamiunik suleqateqarnermi pisortaq. Taakkua arlaat naleqqunnerusoq namminneerlutik toqqassagaat aalajangiunneqarpoq. Tamatuma kingorna CCO-p saaffiginnittumik naapitsilluni oqaloqateqarsimanerata ersersippaa siunnersuutit arlaannaalluunniit tulluarpallaanngitsoq. Taamaattumik Oqaasiliortunut qaaitassanngoqqippoq.

e) 'Den mentale tåge' kalaallisut **sianissutsikkut ikiarsineq**

f) ERP Enterprice Ressources Planning kalaallisut ima taaguuserneqarpoq: **isumalluutunik aqutsinermi pisariillisaaneq.**

g) fritidsklub, skolepasning aamma fritidshjem kalaallisut taaguuserneqarput.

Fritidsklub tassaavoq **sungiffimmi sammisassaqaqtitsivik**

Fritidshjem tassaalluni **atuareersunut paaqqinniffik**

Skolepasning tassaalluni **atuareernerup kingorna ornittagaq**

h) Aatsitassalerinermi taaguutininik katersaatit

Saaffiginnissummi apeqqutigineqarpoq Oqaasiliortut tassunga tunngasunik suliaqarsimanersut.

Saaffiginnittoq akineqarpoq taakkua pillugit sulii immikkut katersatut allattorsimasuutiginnikkivut, naak tulleriarinermi tikitassat ilagigaluarat. Taamaattoq ujaqqanik sammisaqartartut peqatigiiffiat atuakkiallu allat saqqummersinneqarsimasut innersuussutigineqarnissaat aamma kissaatigineqarpoq. Taakkununga ilaallutik H.C.Olsenip H.C.Petersenillu atuakkiaat, Karl Elias Olsenip aamma Inge Kleivanip ujaqqat pillugit allataat/katersugaat.

i) Tunup taaguutaata allanngortikkusunneqarnera pillugu Oqaasiliortut isumaqarput tunngavilersuut ilalernartoqanngitsoq, tassami Tunumik taaguisarneq qangali atuummat sumiiffippassuarnilu assigiinngitsuni naggueqatitsinnissaaq aamma taaguutaareermat. Nunatsinni nalinginnaalluurtut ilagaat Qeqertarsuup Tunua. Tunumiut namminneq Kangiamiunik taagorusulissagaluarunik paatsuungatitsilissaaq Kangiamiut

tassaammata Asiamiut, imlt. danskisut Østen. Pisariaqassappat nunat aqqinik suliaqartoq piunaffigineqarsinnaavoq Tunumik taaguinertallit qassiunerinik sumiinnerinilu takussutissamik suliaqalaaqqullugu, taanna saaffiginnittumut ingerlateqqinneqarsinnaassammat.

4. Allat

Inussiarnersumik inuulluaqqusilluta
Carl Chr. Olsen
Siulittaasoq

Katti Frederiksen
Allatsi